

Պապին ցոյց տալու համար է գրել այդ նամակը, թէ եւ մոռանում է, որ քիչ վերեւում նոյն Աղէքսանդր կաթողիկոսի մասին ինքն ունի հետեւեալ տողերը. «Սա ինքն Աղէքսանդր յառաջ քան զնստել իւր յաթոռ հայրապետութեան, ունէր ընդդիմութիւն առ քաղկեդոնականս եւ առ Աթոռն Հռովմայ եւ գրեալ իսկ էր պիւրք մի փոքրիկ հակառակ բանիւք»:

Այսպիսի սխալ եղբակացութեան մեր պատմագիրը յանդում է մէկ նրա համար, որ իսկապէս ինքը կ'ուզէնար Ամենայն Հայոց Հայրապետութիւնը ենթարկուած տեսնել Հռոմի Պապերին: Մէկ էլ՝ որ նամակում կան — ինչպէս ասացինք — մի շարք քաղաքավարական խօսքեր եւ արտայայտութիւններ. ինչպէս՝ «երկոց երջանիկ տիեզերական հայրապետ, պետական գլուխ, գերիշխանական մեծութիւն, գերագոյն նախագահութիւն, հայր հասարակաց քրիստոնէից, անշիջելի ճահ կաթողիկէ եւ առաքելական եկեղեցւոյ» եւ այլն (եր. 749): Բայց խոհեմաբար լուծւում է նամակի բուն նիւթի մասին, որ էր անշուշտ՝ սանձահարել միսիոնարներին, որոնք ամէն խայտառակութիւն թոյլ էին տալիս իրենց Հայաստանում եւ հայ ժողովուրդի նկատմամբ:

«Փարոս»ի մէջ տպագրուած նամակը բաց է անում քօղը եւ պարզաբանում գրութեան իսկական շարժառիթները: Հայոց կաթողիկոսը պայծառ դոյներով նկարագրում է քարոզիչների դատապարտելի արարքները եւ այն վնասները, որ նրանք հասցնում են քրիստոնէական կրօնին ընդհանրապէս, սերմանելով խռովութիւններ ու երկպառակութիւններ եւ զրզուեցընելով թուլամիտների հաւատը: Հայոց եկեղեցու համառօտ դաւանութիւնը տալուց յետոյ՝ կաթողիկոսը վերջացնում է նամակը այս խօսքերով. — Եթէ դու սրանից յետոյ էլ վը շարունակես համարել հայերին հերձուածող՝ դա քո կամքն է. իսկ եթէ ոչ՝ ապա խնդրում ենք նամակով ներչնել քարոզիչներին յետ կենալու այն շար գործերից, որոնք ամենեւին չեն վայելում քո սրբազան անուանը: Եթէ Բրբրիստոսի սիրոյ համար դու ցոյց կը տաս մեզ այդ շնորհը, բարեհաճիր քո նամակն ուղարկել մեզ, որպէսզի ներկայացնենք քարոզիչներին եւ թերեւս նրանք յետ կենան զէպի քրիստոնէաները տաճած իրենց ատելութիւնից: Բայց ի հարկէ, նամակը մնաց անպատասխան (Եգեան, նոյն, 27):

Սրանով մենք չենք ուզում ժխտել պատմական այն իրողութիւնը, որ հայ եկեղեցականներից, մասնաւորապէս հայոց կաթողիկոսներից ոմանք յերաւի ձգտել են բարեկամութեան կաթողիկէ եկեղեցու հետ, դեռ Ռուբինեանց օրերից սկսած: Յայտնի են, զոր օրինակ, Ներսէս Լամբրոնացու, Գրիգոր Վկայասէրի, Գրիգոր Տղայի, Յովհաննէս Մեծարարոյի, Կոստանդին Բարձրաբերդցու եւ այլոց փորձերը: Դեռ աւելին. Գրիգոր է. Անաւարդեցի կաթողիկոսն այնքան առաջ զնաց այդ ուղղութեամբ, որ մինչեւ իսկ համաձայնեց որոշ փոփոխութիւններ կատարել հայոց եկեղեցու ծէսերի մէջ՝ այդ բարեկամութիւնը գլուխ բերելու համար<sup>1)</sup>: Թէպէտ այդ բոլոր փորձերն էլ անյաջող անցան եւ հայ ժողովրդի բուռն ընդդիմութեան հանդիպեցին, բայց եւ այնպէս փաստը մնում է իբրեւ փաստ:

Սակայն պիտի ընդգծել, որ այդ փորձերի բուն շարժառիթը բնաւ այն չէ, ինչ որ սովորաբար ներկայացնում են կաթողիկէ պատմագիրները, որոնց թուած նաեւ Հ. Չամչեանը. — որ իբր թէ Լուսաւորչական հայերը զգալով, որ իրենց եկեղեցին հերձուածող է եւ ուղղափառ դաւանութիւնից չեղուած, ցանկանում էին ուղղափառ եկեղեցու գիրկը զառնալ եւ երկնքի արքայութեան դռները բաց անել իրենց առջեւ: Ո՛չ: Իսկական շարժառիթն ուրիշ էր. այդ բարեկամութիւնը հայութեան կողմից երբեք չէ հասկացուել եկեղեցիներից մէկն ու մէկի — ներկայ զէպրում՝ հայոց եկեղեցու — ձուլման, միութեան մտքով: Նա անհրաժեշտ է համարուել նախ եւ առաջ քրիստոնէական 2 քօյր եկեղեցիների համերաշխութեան տեսակէտից, եւ ապա, որ եւ ամենից գլխաւորն է, հայ ժողովրդի քաղաքական շահերի տեսակէտից: Դա հարկաւոր էր Արեւմուտքի օգնութեամբ Ռուբինեանց փոքրիկ անկախութիւնը ամէն կողմից տեղացող մահմեդական հարուածներից պաշտպանելու համար:

1) Կ. Թումայեան «Պատմ. Արեւել. խնդրոյ եւ առաջնորդ հայկ. հարցի», Լոնտոն, 1905 թ. Ա., 350-352: